



Kwa Kupatana na Sheria

ya Mungu

Lakini, Msamaria mmoja katika kusafiri kwake alifika hapo alipo; na alipomwona alimhurumia, ... akamtunza.—**Luka 10:33, 34.**

Kristo alijua kuwa hakuna anayeweza kutii sheria katika uwezo wake mwenyewe. Alitaka kumwelekeza huyu mwanasheria afikie uchunguzi ulio wazi na wa ndani zaidi ili aweze kupata ukweli. Ni kwa kukubali tu wema na neema ya Yesu ndipo tunaweza kuitunza sheria. Kuamini katika kafara kwa ajili ya dhambi, kunaweza kumsaidia mtu aliyeanguka ampende Mungu kwa moyo wake wote na jirani yake kama nafsi yake.

Huyu mwanasheria alielewa kuwa hakuwa ametunza zile amri nne za kwanza wala zile sita za mwisho. Alijiona mkosaji kutokana na maneno ya Kristo yenye kutafakarisha; Lakini badala ya kuungama dhambi yake, alijaribu kuihalalisha. Badala ya kukubaliana na ukweli, alionesha jinsi ilivyokuwa vigumu kutimiza sheria. Hivyo alitazamia kupishia mbali kule kujielewa alivyo, ili ajikoshe mbele ya macho ya watu. Maneno ya Mwokozi yalionesha kuwa swali lake halikuwa na umuhimu wowote, kwani aliweza kulijibu mwenyewe. Hata hivyo aliongezea na swali lingine, “Jirani yangu ni nani?”

Hapo tena Kristo akakataa kukokotwa na kuingizwa ndani ya ubishi. Alijibu swali kwa kuelezea kisa, ambacho kilikuwa kingali kinakumbukwa na wengi wa wasikilizaji Wake. “Mtu mmoja” Yeye alisema, “alishuka toka Yerusalemu kwenda Yeriko, akaangukia kati ya wanyang’anyi; Wakamvua nguo, wakamtia jeraha, wakaenda zao, wakamwacha karibu ya kufa”....

Alipokuwa amelala hivyo, kuhani alikuja pale, akamwona mtu yule amelala, amejeruhiwa na kukwaruzwa, akigaagaa katika damu yake mwenyewe; lakini akamwacha bila kumsaidia. “Alipita kando,” Mlawi akatokea. Akiwa na shauku kuona limetokea jambo gani, alisimama na kumtazama yule aliyeumia. Alielewa lililompasa kutenda, lakini haikuwa kazi ya kupendeza. Akatamani kuwa angepitia njia nyingine, ili kujiepusha na kumwona mtu yule aliyejeruhiwa. Akajifariji kuwa shughuli hii haikumhusu, hivyo nae alipita kando.”

Lakini Msamaria aliyekuwa akisafiri barabara ile ile, alimwona aliye na maumivu, na akaifanya ile kazi ambayo wengine walikataa kuifanya. Kwa huruma na upole, akamhudumia aliyejeruhiwa. “Na alipomwona alimhurumia, akakaribia akamfunga jeraha zake, akazitia mafuta na divai, akampandisha juu ya mnyama wake, akampeleka mpaka nyumba ya wageni, akamtunza, hata siku ya pili akatoa dinari mbili, akampa mwenye nyumba ya wageni, akisema, “Mtunze huyu na cho chote utakachogharamia zaidi, mimi nitakaporudi nitakulipa.” Kuhani na Mlawi, wote walikuwa wanakiri kuwa watawa, lakini Msamaria ndiye alionesha uongofu wa kweli. Haikuwa rahisi kwake kuifanya ile kazi zaidi ya kuhani na mlawi, lakini katika moyo wake na kazi alionesha kuwa alikubaliana na matakwa ya Mungu (Lulu za Uzima, uk. 270 – 271).